

आकाशवाणी

खबरां

1. पैहला वेव्ज सम्मेलन अज्ज मुम्बई च शुरू, प्रधानमंत्री नरेंद्र मोदी होरें आखेआ जे मजूदा समें भारत लेई रचनात्मकता दे खेत्तर च दुनिया दी अगुवाई करने दा बनकदा मौका ऐ।
2. सूचना ते प्रसारण मंत्री होरें आखेआ जे वेव्स समेलन आर्थिक विकास दे केई नमें रस्ते खोल्लगा।
3. मुल्ख च जीएसटी टैक्स च अप्रैल म्हीने च 12 इशारिया 6 प्रतिशत दा बाद्दा दर्ज कीता गेआ ऐ।
4. उपराश्ट्रपति जगदीप धनखड होरें आखेआ ऐ जे पहलगाम आतंकी हमले दे बाद समूलचे मुल्खे गी इक-मिक्क होई जाना लोडचदा।
5. सरकारै इस बरे अजे तोडी कनकू दी रिकार्ड 256 लक्ख मीट्रिक टन खुश-खरीद करी लैती दी ऐ।
6. बधदी गर्मी दे चलदे राश्ट्रीय मानवाधिकार आयोग नै 11 राज्यें गी कमजोर वर्गें दे लोकें दी सुरक्षा गितै एहतियाती गैई पुट्टने लेई आखेआ ऐ।
7. बैडमिंटन खडारी चिराग शेटी ते सात्विक साईराज रंकी रेड्डी गी मेजर ध्यानचंद खेल रत्न पुरस्कार 2023 कन्नै सम्मानित कीता गेआ गेआ ऐ।

<><><><><><>

**PM-Waves**

प्रधानमंत्री नरेंद्र मोदी होरें आखेआ ऐ जे भारत लेई रचनात्मकता दे खेत्तर च दुनिया दी अगुवाई करने दा एह बनकदा मौका ऐ। मुम्बई दे जिओ वर्ल्ड कन्वेंशन सेंटर च पैहले विजुअल एंटरटेनमेंट सम्मेलन दा उद्घाटन करदे मौके मोदी होरें आखेआ जे वेव्स सम्मेलन इक संक्षिप्त शब्द गै नेई सगुआं संस्कृति, सृजनात्मकता ते वैश्विक संपर्क दी इक बड्डी लैहर ऐ। उनें आखेआ जे एह मंच कलाकारें, निवेशकें, नमियां काहडां कडुने आहलें, नीति निर्माताएं गी इक्के थाहरा पर किट्टे होने ते नमें विचारें गी मौका देने च मददगार साबत होग ते एहदे नै भारत दी रचनात्मक ताकत कुल संसारी सतह पर उजागर होग। सम्मेलन च 100 कोला मते मुल्खें थमां लोक हिस्सा लैने गितै आए देन। मोदी होरें आखेआ जे भारत फिल्म निर्माण, डिजिटल विषय सामग्री गेमिंग, फैशन, संगीत ते लाइव कन्सर्ट लेई इक कुल संसारी केंद्र दे रूपै च उभरै करदा ऐ ते लाइव एंटरटेनमेंट उद्योग विशेष रूप कन्नै लाइव कन्सर्ट बी देश दी वृद्धि बरोस दी बेशमार छमता रखदा ऐ। मोदी होरें आखेआ जे मजूदा समें च एनिमेशन बजार दा मूल्ल कोई 430 अरब डालर कोला मता ऐ ते अगले 10एं बरें च एहदे दूना होई जाने दी मेद ऐ।

<><><><><><>

**I&B-Minister Waves**

सूचना ते प्रसारण मंत्री अश्विनी वैष्णव होरें आखेआ ऐ कि वर्ल्ड आडियो विजुअल एंटरटेनमेंट सम्मेलन नमें-नमें आर्थिक विकास दे मौके पैदा करोग। अज्ज मुम्बई च वेव्स सम्मेलन दे उद्घाटन सत्र गी संबोधित करदे होई उनें आखेआ जे एह सम्मेलन रचनाकारें गी इक कुल संसारी सतह दा मंच उपलब्ध कराग ते नमिं प्रौद्योगिकिं दे बारे च जानने दा मौका देग। वैष्णव होरें अगो आखेआ जे मुम्बई च 400 करोड़ रपे दी लागत कन्नै भारतीय रचनात्मक प्रौद्योगिकी संस्थान स्थापित कीता जाग। उनें आखेआ जे वेव्स ते भारतीय रचनात्मकता पर आयोजित प्रौद्योगिकी, कुल संसारी क्रिएटिविटी तंत्र दे रूपै च मुम्बई दी भूमिका गी होर निगगर करोग।

<><><><><><>

**GST**

मुल्खे च माल-समेयान ते सेवाएं सरबंधी जीएसटी टैक्स च अप्रैल म्हीने दे दौरान पिछले बरे दी इससै अवधि दे मकाबले 12 इशारिया 6 प्रतिशत दा बाद्दा दर्ज कीता गेआ ऐ ते एह अजें तोडी दे सब्बनें शा मते 2 लक्ख 37 ज्हार करोड़ पर पुज्जी गेआ ऐ। सरकारी आंकडें मूजब केंद्री जीएसटी कलेक्शन इससै म्हीनें दे दौरान बधियै 48 ज्हार 634 करोड़ रपे ते राज्य जीएसटी बधियै 59 ज्हार 372 करोड़ रपे तगर पुज्जी गेआ ऐ।

<><><><><><>

## Labour Day

अज्ज पैहली मई ऐे जिसी पूरी दुनिया च श्रमिक दिवस दे तौर पर मनाया जंदा ऐे। एहू ध्याड़ा दुनिया भरै दे मजूरें ते कम्मगारें दे अधिकारें ते विकास च उन्दे योगदान गी चेत्ता करने दा ध्याड़ा ऐे। प्रधानमंत्री नरेंद्र मोदी ते गृह मंत्री अमित शाह होरें विश्व श्रमिक दिवस दे मौके पर मुल्खा दे सब्भनं मजूरें-कम्मगारें गी मुबारकबाद ते शुभकामनां दित्तियां ना। अपने इक सोशल मीडिया पोस्ट च उनें आखेआ जे विकसित भारत दा सुखना सच करी दस्सने लेई दिन रात मेहनत करने आहले मजूरें दे जीवन गी सैल-सखल्ला ते सुविधाजनक बनाना बड़ा जरूरी ऐे। जेड़े अपने कठन मेहनत ते समर्पण भाव कन्नै देसै दी अर्थ बवस्था गी मजबूत करने च योगदान दिंदे ना। अमित शाह होरें आखेआ जे स्हाड़े कम्मगार राष्ट्र दे निर्माण दा इक्क मजबूत थम्म ना। उनें भरोसा दोआया जे सरकार उन्दी भलाई-बेहतरी ते बाद्दे विकास लेई पूरी-चाल्ली बचने बज्जदी दी ऐे ते मजूरें दी खुशहाली लेई कोई कोर-कसर नेई छोड़गा।

<><><><><><>

## Procurement

खुराक ते सार्वजनिक बंड बिक्री सरबन्धी मैहकमे दे सचिव संजीव चोपड़ा होरें आखेआ ऐे जे सरकार इस बरे अजे तोड़ी 2 करोड़ 56 लक्ख मीट्रिक टन कनकू दी खुश खरीद करी चुकी दी ऐे। नमीं दिल्ली च पत्रकारें गी जानकारी दिंदे होई उनें आखेआ जे सरकार इस बरे दी खीरै तोड़ी 3 करोड़ 12 लक्ख मीट्रिक टन दा लक्ष्य लेइयै अगड़े बधै करदी ऐे। उनें गलाया जे हून करसानें गी कनकू दी बिक्री करने च बड़ी सौख होई गेदी ऐे कीजे उनेंगी आनलाइन नां दर्ज कने, समें पर कनकू दी तौल ते 48 घंटे दे अंदर-अंदर घट्टोघट्ट समर्थन मूल्ल यानि एमएसपी दे भुगतान दी सुविधा बी हासल होआ करदी ऐे। खंडू पर नियंत्रण सरबन्धी 2025 आहले हुक्म दा जिक्र करदे होई चोपड़ा होरें आखेआ जे इस हुक्म दा मकसद मजूदा उद्योग दी रफ्तार ते तकनीकी प्रगति दे साब्वै चीनी क्षेत्र नियामक ढांचे गी सखल्ला सेहत ते सुविधाजनक बनाना ऐे।

<><><><><><>

## NHRC-Heat Waves

मुल्खै दे बक्ख-बक्ख हिस्सें च सोए दौरान चलने आहली लूह दी स्थिति गी ध्यानै च रखदे होई मनुक्खी अधिकारें सरबन्धी राष्ट्रीय आयोग एन.एच.आर.सी नै मुल्खै दे 11 राज्यें गी अपने कमजोर तबकें दे लोकें दी सुरक्षा लेई तुरत एहतियाती गैई पुट्टने लेई आखेआ ऐे। आयोग नै पंजाब, हरियाणा, उत्तर प्रदेश, बिहार, झारखंड, पच्छिम बंगाल, ओडिशा, आंध्र प्रदेश, तेलंगाना, महाराष्ट्र ते राजस्थान गी आखेआ ऐे जे ओहू माली तौरा पर कमजोर, बाहरा आइयै उत्थै रवा करदे मजदूरें, बुजुर्गें, बच्चें ते बेघर लोकें गी गर्मी ते लूह कोला बचाने लेई लोड़चदे उपाऽ करना।

<><><><><><>

## Ram-Krishan

अज्ज राम-कृष्ण मिशन दा स्थापना दिवस ऐे। पैहली मई 1897 गी स्वामी विवेकानंद होरें उत्तरी कोलकाता च ठाकुर रामकृष्ण हुंदे मुरीद बलराम बसु हुंदे घरै च राम कृष्ण मिशन दा मुंड पाया हा। मिशन दा उद्देश्य ठाकुर राम कृष्ण हुंदे आदर्शें दा प्रचार करना हा। एहू ध्याड़ा बेलूरमठ ते बलराम मंदर च बी मनाया जा रदा ऐे। बडुलै सवां गै उत्थे उन्दे अनुयायिणं दा भारी रश दिक्खने गी लब्बा करदा ऐे।

<><><><><><>

## Election

चुनांऽ आयोग नै मतदाता सूचियें गी त्रुटीरैहत बनाने ते मतदान प्रक्रिया गी नागरिकें लेई मता सखल्ला बनाने दे उद्देश्य कन्नै नमें उपाऽ शुरू कीते ना। मतदाता सूचना पर्चियें गी होर मता मतदाताएं दे स्हावै बनाने लेई आयोग नै उन्दे डिजाइन गी संशोधित करने दा फैसला कीता। मतदाताएं दा सीरियर नंबर गी होर प्रमुखता कन्नै प्रदर्शित कीता जाग जेदे च उसी हून बडु अक्षरें च लिखेआ जाग। चुनां आयोग नै होर दूइयें महत्वपूर्ण बदलावें दे कन्नै एहू निर्देश बी दित्ते जे ईआरओ आसेआ नियुक्त सब्भनं बीएलओ गी मानक फोटू पंछान पत्र जारी कीते जान।

<><><><><><>

## Mandviya-Khel Rattans

युवा मामलें ते खेड्णें सरबंधी केंद्री मंत्री डॉ. मनसुख मांडविया होरें अज्ज नमीं दिल्ली बैडमिंटन खडारी चिराग शेट्डी ते सात्विक साईराज रंकी रेड्डी गी मेजर ध्यानचंद खेल रत्न पुरस्कार 2023 कन्नै सम्मानित कीता। इक सोशल मीडिया पोस्ट च डॉ. मांडविया होरें आखेआ जे एह पुरस्कार दौनें खडारिणं दे समपर्ण भाव ते गैर ममूली प्रदर्शन गी सम्मान ऐ। उनें इनें दौनें खडारिणं गी भविक्ख लेई शुभकामनां बी दित्तियां।

<><><><><><>

## IPL

आई.पी.एल क्रिकेट च अज्ज राजस्थान रायल्स दा मुकाबला मुम्बई इंडियन्स कन्नै होगा। जयपुर दे सवाई मान सिंह स्टेडियम च एह मैच हुनै कोला किश चिर मगरा ठीक साड्डे 7 बजे शुरू होगा। अज्ज इक बारी परतियै सब्बनें दियां अक्खी राजस्थान रायल्स दे 14एं बरें दे खडारी वैभव सूर्यवंशी पर हांगन जिन्नै अपने पिछले मैच च 35 गेंदें च रिकार्ड त्रोट शतक लाइयै सब्बनें गी रहान करी दित्ता हा। अज्ज वैभव दा प्रदर्शन राजस्थान दी टीम लेई फैसलाकुन साबत होई सकदा ऐ जेडी एल्लै करो जां मरो आहली स्थिति च ऐ। एहदे शा पैहले कल खेड्डे गेदे मैच च पंजाब किंग्स नै चेन्नई दे एम.ए चिदम्बरम स्टेडियम च चिन्नेई सुपर किंग्स गी 19 ओवर ते 2 गेंदें च 190 रन्ज बनाइयै आउट करी दित्ता ते परते च 19 ओवर ते 4 गेंदां खेडदे होई 6 विकटां मोहाइयै 194 रन्ज बनाए ते मैच जिती लैता।

<><><><><><>

## V.P Pahalgam

उपराश्ट्रपति जगदीप धनखड होरें अज्ज आखेआ ऐ जे पहलगाम आतंकी हमले कन्नै जुडी दिणं चुनौतिणं कन्नै निब्वडने लेई समूलचे मुल्लखै गी इक मिक्क होई जाना लोडचदा ते आतंकवाद दा मकाबला करने लेई सब्बै इक्क रास होना लोडचदा। उपराश्ट्रपति होरें आखेआ जे राश्ट्र दा हित सब्बनें शा उप्पर रखदे होई आतंकवाद दे खतरे गी म्हेशा-म्हेशा लेई खत्म करी सकने आं। उत्तर प्रदेश दे लखनऊ च इक कताब दा विमोचन करदे होई उनें एह गल्ल अक्खी। “चुनौतियां मुझे पसंद हैं” नां दी इस कताब च राज्यपाल आनंदी बेन पटेल हुंदे जीवन सफर दा जिक्र ऐ।

<><><><><><>

## EAM

विदेश मंत्री डॉ. एस जयशंकर होरें अज्ज बडुलै दक्खन कोरिया दे अपने हमरूतबा चोते युल हुंदे कन्नै टेलीफोन पर गल्लबात कीती। अपनी सोशल मीडिया पोस्ट च विदेश मंत्री होरें आतंकवाद दे सब्बनें रूपें ते अभिव्यक्तिणं दे खलाफ इकजुट होइयै लडने दी जरूरतै पर जोर दित्ता। उनें चेचा करियै पहलगाम आतंकी हमले दे सरबंधै च कोरियाई गणराज्य आसेआ भारत गी समर्थन दिंदे होई इकजुटता दस्सने लेई चोते युल हुंदा आभार प्रगट कीता। एहदे अलावा डॉ. एस जयशंकर होरें कल अमरीकी विदेश मंत्री मार्को रूबियो हुंदे कन्नै बी गल्लबात कीती जेदे च उनें पहलगाम आतंकी हमले गी अंजाम देने आहलें, एहदी योजना बनाने आहलें ते साजिश च सहयोग देने आहलें गी सजा दोआनें दा आह्वान कीता हा।

<><><><><><>

## NIA

राश्ट्री जांच एजेंसी-एन.आई.ए दे महानिदेशक सदानंद दाते होर पहलगाम आतंकी हमले दी जांच दे सिलसिले च अज्ज पहलगाम पुजे। ध्यानजोग ऐ जे जंदी 22 अप्रैल गी पहलगाम च होए दे हमले च 26 लोकें दी मौत होई गई ही जिंदे च 25 सैलानी ते 1 मकामी बसनीक शामिल हा। मेद ऐ जे एनआईए आसेआ हमले आहली थाहरै पर व्यापक जांच करियै फोरेंसिक सबूत किट्टे कीते जाडन जिंदे राहें कसूरवारें दी शिनाख्त च मदाद थ्होग। तोआई, जम्मू-कश्मीर च आतंकवादी नेटवर्क दा समूलचा नास करने ते आतंकवादिणं दे भैडे मन्सूबें गी नाकाम बनाने दे मकसद कन्नै सुरक्षाबलें आसेआ समूलचे प्रदेश च सुरक्षा बवस्था निगगर करी दित्ती गई ऐ।

<><><><><><>

## India Air Space

पहलगाम आतंकी हमले गी दिक्खदे होई भारत ते पाकिस्तान एयरस्पेस लेई अपना ब्हाई क्षेत्र बंद करी दित्ता ऐ। ब्हाई क्षेत्र बंद होने दा कम्म 23 मई तगर लागू होगा। नागरिक हवाबाजी मंत्रालय नै दस्सेआ ऐ जे इस दरान

पाकिस्तान च पंजीकृत जहाजें, पाकिस्तान एयर लाइंस जां फौजी जहाजें सनें संचालकें आस्सेआ चलाए जा'रदे स्वामित्व आले जां पट्टे उप्पर लैते गेदे जहाजें लेई भारतीय ब्हाई क्षेत्र उपलब्ध नेई ऐ। पाकिस्तान एयर लाइंस गी भारतीय ब्हाई क्षेत्र दा इस्तेमाल करने पर रोक लाई गई ऐ।

<><><><><><>

### **Ceasefire-Violation**

पाकिस्तानी बलें जंदी उप्परोतली 7मीं रातीं जम्मू-कश्मीर च कब्जा रेखा पर बिजन भडकावे दे गोलीबारी कीती। रक्षा सूत्तरें मूजब पाकिस्तान आसेआ लौहके थेहारें कन्नै कीती गेदी गोलीबारी दा भारती बलें असरदार ढंगै'नै परता दित्ता। हासल जानकारी मूजब पाकिस्तानी बलें कुपवाड़ा, उड़ी ते अखनूर सैक्टरें च कब्जा रेखा दे इस पार आहले इलाकें पर लौहके थेआरें कन्नै बिजन इश्तेयाल दे गोलीबारी कीती। सौहगे भारती जवानें इस गोलीबारी दा बनकदा परता दित्ता।

<><><><><><>

### **SC-Pahalgam PIL**

सर्वोच्च अदालतै पहलगाम च हाल च होए दे आतंकवादी हमले दी जांच लेई दायर इक्क जनहित याचिका पर सुनवाई थमां नांऽ करी दित्ती ऐ। अदालतै चेतावनी दित्ती ऐ जे इस चाल्ली दी गेंऽ नेय महत्वपूर्ण समें पर थेआरबंद बलें दा मनोबल घट्ट करी सकदी ऐ। सुप्रीम कोर्ट नै इब्बी आखेआ ऐ जे इस चाल्ली दी याचिका दायर करने थमां पैहले इस मामले दी संवेदनशीलता गी ध्यानै च रखना चाहिदा हा। अदालतै याचिका दायर करने आहले गी एह याचिका वापस लैने लेई आखेआ। जम्मू-कश्मीर दे त्रै बसनीकें आसेआ दायर कीती गेदी एह याचिका मगरा वापस लेई लैती गई ऐ।

<><><><><><>

### **BSF-Terror**

सीमा सुरक्षा बल बीएसएफ नै पंजाब दे अमृतसर च इक आतंकवादी साजिश गी नकाम करदे होई खरी मती मात्रा च थेआर-असलाह, गोला-बरूद बरामद कीता ऐ। बीएसएफ दे खूफिया सीगे सवां हासल जानकारी दी बिनाह पर कार्रवाई करदे होई जिले दे भरोपाल ग्रं कश इक सांझा तुपाई अभियान चलाया गेआ जिस दौरान एह बरामदगी कीती गई जेदे च त्रै पस्तोलां, 6 मैगजीनां, 2 हत्थगोले ते 50 रौंद गोलियां शामिल ना। बरामद थेआर ते गोलीबरूद गी पुलसै दे हवाले करी दित्ता गेदा ऐ ते इस बारै अग्गे दी तफतीश कीती जा'रदी ऐ।

<><><><><><>